

# Vizyon

## Laviktwar pour Lekspresyon

**E**n viktwar tre enportan in ganny anrezistre pour drwa lekspresyon devan lakour dan Sesel. Lakour Siprenm in donn zizman an-faver Mr. Alain Ernesta dan ka kot i ti pourswiv Komisyonner Lapolis akoz lapolis ti anpes li vann son CD dan Lari Bazar e menm sezi serten kantite son lanmizik. Lakour in fer kler ki lapolis tya pe azir kont Konstitisyon letan i ti fer sa. Zot in fer kler ki Komisyonner lapolis napa drwa determinen kwa ki en dimoun i sante. Sa i drwa sa artis, e si i anvi met politik dan son sanson i ganny drwa fer li. Saverdir latitud dominer fodre arete Sesel.

### Lapolis dominer

I pa fer premye fwa ki lapolis i azir dominer kont Mr. Alain Ernesta. Son lannen avan, letan i ti fer sorti son CD Nwel, ansyen Komisyonner Kilindo ti donn lord pou anpes li vann son CD akoz sanson Felix ti tape menm. I pa ti kontan bann parol laverite dan sa sanson. Me la aprezan lakour in montre klerman ki sa desizyon pa ti bon. Kestyon ki nou pe demande dan SNP se ki kantite desizyon ki Mr. Kilindo in pran ki pa ti bon, me ki in ganny soutire? Sa latitud dominer ki lapolis i pran pabon ditou e nou pou kontinyen demande ki zot arete.

### Domaz ek Konpansasyon

Lakour Siprenm in demande ki gouvemman, atraver move desizyon ek aksyon Mr. Kilindo, i pey Mr. Ernesta anviron R40,000 konpansasyon pour pert lavant sa CD. Sa i enkli fre pou prodwi sa CD, aste CD vid, e tou lezot depans ki ale avek prodiksyon en CD. Lo lot kote, lakour in osi demande ki Gouvemman i pey li en somm R20,000 pour domaz moral. Eski sa ankor enn fwa pa montre nou klerman ki manyer letan dimoun pa fer son travay dan en fason profesyonnel i kout pei larzan? Si selman Mr. Kilindo ti'n respekte drwa Mr. Ernesta tou sa pa ti pou arrive.

### Mr. Ernesta - En vre konbatan

Mr. Ernesta i tipti grander, me son determinasyon pour laliberte lekspresyon i vreman for. In tout-tan pare pour li debout e koz kont tou sa bann keksoz mal ki pe arive dan nou pei. Malgre ki SPPF in deza esey aste li, in montre ki manyer i for. Sa demyen konba i montre li koman en dimoun vreman determinen. Pti Ernesta in debout kont gro Golyat e in ranport laviktwar. Sa i devret vin en sours lenspirasyon pour tou dimoun ki pe rod vre laliberte dan nou pei. Mr. Ernesta i montre nou ki pour sa pei avanse e sanzman arive, dimoun i devret pare pou eksprim zot lekor e debout pour sa ki zot krwar ladan. Determinasyon ki enportan.

### SNP i fyer Alain Ernesta

Ozordi Mr. Ernesta pe travay koman reprezantan SNP lo La Digue. I kontinyen partaz parol ki pou anmenn vre laliberte avek tou dimoun. I pas devan laport dimoun pou esey fer zot konpran sa ki pe arive dan nou pei. SNP i vreman fyer pou annan en dimoun parey Mr. Ernesta dan nou parti, e nou pe donn li tou sipor ki i bezwen. Avek sa kalite lespri, nou pou anmenn sanzman dan nou pei Sesel. Tro bokou dimoun pe soufer e i kler ki nou bezwen plis dimoun parey Mr. Ernesta ki pa re pou vin devan, aret per, me montre ki nou kapab bouz pli gro montanny letan nou determinen. Depi lontan Mr. Ernesta pe esey 'Roul sa gro Ros'. Atansyon ros pe degrengole!

## Lager pozisyon dan SPPF

**Z**afer i vreman sal dan SPPF e sakenn pe profite pou montre ki zot lake pli ponpon avek en sel bi: Ganny en pozisyon pli for posibil. Sa pe fer ki antre zot dan Maison du Peuple, i annan en kantite move koze lo kanmarad.

Sa gro problemn i vin prensipalman akoz lannen prosenn i sipoze annan sanzman enportan dan gouvemman. Mr. Belmont pe pran son retret e alor i pou arete koman Vis Prezidan. I kler ki se Mr. Danny Faure ki pe pran sa pozisyon. Avek depar Minis Pillay i osi vedir ki i annan omwen en lot pozisyon minis ki vid. Se la kot kankan pe arive.

Demyen lenformasyon se ki Mr. Morgan pe tap tou pour li pran plas Minis Dezinye. I dir ki i pli malen ki tou bann lezot minis e li i ava kapab fer en pli bon travay. Deswit pandan ki Prezidan pa ti dan pei, in taye pou fer tou kalite miting avek bi ganny sipor lezot dimoun. Mr. Michel i kontan li akoz i pare pou fer tou sa ki i

ganny dir. I ganny trouve koman en vre makro.

Minis Meriton pe osi lager pour sa pozisyon. I trouve ki li zanmen in deza SNP tandi ki Morgan ti dan Parti Seselwa e menm koze dan miting.

Marie-Antoinette Rose, pe tap tou pou ganny plas minis avan Mrs. Potter. I dir ki fodre annan plis fanm e li i pli entelizan. I pe ganny tou sipor Speaker Lasanble, ki li osi pe esey ganny pozisyon Vis - Prezidan malgre ki i riy avek Minis Faure.

Me antretan, Minis Pillay pe demande ki pe arive avek son pozisyon ambasader Langleter. I pe eksprim dezapwentman an-prive. Mr. Jean-Paul Adam pe lager plas Minis Zafer Etranzer avek Mr. Calixte D'Offay!

Antretan Minis Dugasse pe debat pour son pozisyon akoz i kapab ganny savire nenport ler. Li osi i pe koz koze atraver an-prive avek bann dimoun ki pre avek li. Nwa kontinyen gard zot enformen. Zafer i sal!

# Patriotizm vs Laverite

**Z**ournal Nation in ganny pri pe diform sa ki dimoun i dir ankor enn fwa. Sa fwasi i konsern en zournalis Ameriken, ki ti isi pe fer en seri kozri lo laliberte lapres. Sa madanm ti tre ankoler Vandredi le 16 Oktob letan sa zournal ti ekri ki in byen akeyir lide gouvèrnman pour etablir en komisyon medya pour pini *journalism irresponsab*.

I pa premye fwa ki 'Nation' i fer en tel betiz. 'Nation' i annan repitasyon pran sa ki en dimoun i dir e entepret li dan en fason, pour donn kredibilite gouvèrnman e kree lenpresyon ki Sesel i parfe. Pour zot i pli enportan ki ou patriotik e innyor laverite!

Pli bonner sa lannen zot ti raporte ki en parlanter Angle in felisit bann rankont konsiltativ koman en gran leksersis dan lademokrasi, kan sa boug pa ni ti familye avek sa ki pe vremen arive. Sa voyaz sa ki sa madanm ti dir se ki sa komisyon fodre i promouvwar laliberte lapres, asire ki i annan lalwa pour protez zournalis e ed zot travay dan en fason lib. In klerman azoute ki fodre pa Sesel i ganny en komisyon ki son sel bi se pour silans e opres lapres.

Sa dernyen lensidan i montre klerman ki sa zournal 'Nation' i zis en portparol pour gouvèrnman. Malgre ki i ganny finanse par larzan lepep, zot la zis pou donn kredibilite Gouvèrnman. Eski zot kwar ki lepep Seselwa pa war letan sa zournal i la zis pou montre portre Mr. Michel e aplodi tou sa ki i fer?

Ozordi i nesese pour ki sa zournal i sanz son fason fer keksoz. Nou pa kapab zis kontinyen anbet nou pep e nourri zot avek tou kalite mansonz pou gard Mr. Michel o-pouvwar. Lepep Seselwa i oule laverite. Nou fatigue avek bat latet ki zis fer nou kwar keksoz i ok kan nou dan salte. Aranz zot enpe!

## PAS PARTOU

### Lanblennm Coco de mer

Koze i deor. Arab pa kontan lanblennm cocodemer lo paspor Seselwa akoz i ofansiv pour zot. Alor lotorite Seselwa in oblize sanz sa senbol lo paspor e ranplas li par en triyang. Sanmenm sa Sesel pour Seselwa? Nou pran lord avek Arab aprezan?!

### Upper middle class

Ozordi i annan en nouvo klas dan Sesel. En pti group dan SPPF pe dekri zot lekor koman 'upper middle class'. Andot bann *nouveau riche*. Tou pti biznes pe partaz antre zot e tou kontra gouvèrnman zot ki gannyan. Se sanmenm sa bann ki pe kesty-

# Larogans dan Lasanble

**Minis Joel Morgan semenn pase ti n vin dan Lasanble lo son gro seval pour konfront Lopoziyon. Sa Minis ti totalman mank respe pour sa lenstistiyon letan i ti debout parey en zanfan ki pe fer kankan e dir avek bann manm *dir sa ki zot anvi, mon pa tandé*.**

I vremen fer lapenn pou vwar en minis azir dan sa fason devan en lenstistiyon ki i dwatet respekte. I osi tris ki Deputy Speaker ti refize met li dan son plas malgre sa minis ti klerman an defo e Lopoziyon ti proteste.

Bann tel latitid arogan napa plas dan en demokrasi ki pe evolue e kot Lasanble i annan en responsabilite pou fer brans ekzekutiv rann kont.

Msye Morgan pa premye minis ki vin devan Lasanble e perdi son sanfrwa. Nou'n vwar menm larogans sorti kot Minis Meriton avek Minis Dugasse dan leparse. Kekfwa Danny Boy i merit ansenny zot enpe lo fason konport zot, fas avek vre politisyen.

Me sa ki vremen enkyetan se ki dan SPPF i annan en lager pouvwar ki'n fini komanse pou gete lekel ki pou vin Minis Dezinye letan Minis Faure i vin Vis-Prezidan lannen prosenn. Morgan pe tap tou pour tou, e Meriton osi pa pe les son 'par aux chiens'. Nwa gete. Kekfwa en konpetisyon larogans i ava rezourd sa konpetisyon e Mr. Michel i ava ganny sa kalite dimoun ki i pe vremen rode. Konpetisyon pou dir. Lepep pe note!

## Let ouver pour Msye Michel

### Ser Imsye Michel,

La ki ou'n fini ou letour otour pei dan 80 zour, akonpanyen par 2 jeep, 4 moter e 2 dozenn tonton makout, mon pe espere kwa ki pour sanze dan mon lavi.

Mon pe sipli ou pour ou respekte mon douler koman en malere. Menm si mon anbarase, mon bezwen dir ou laverite. Sa saler ki mon gannyan i enferyer, i pa ase pour ariv ziska le 15. Eksa mon annan 3 pti banben, alor kan i ariv le 10, mon bezwen demann enpe manze prete. Olye monte, mon pe tro anfonse, msye Michel!

Mon demande si ou napa en konsyans sarze? Telman mon douler i for, mon nepli kapab bare. Swadizan nou pe viv dan en

Sesel modern. Me mon pe vwar bokou mon frer pe retourn annaryer. Keksoz dan magazen i vin pli ser.

Mon pa konnen si ou pe konpran sa douler lo mon leker. Mon konnen ou pa konnen ki savedir soufrans, me si ou ti viv en mwan lo mon saler, mon asire ou ti pou ganny latak leker. Alor mon fatigue manz margoz anmer.

Mon konnen ki anler i annan en Bon Dye, mon pe zis priye e esper lavolonte. Mon konnen ki en zour keksoz pour bezwen sanze. Me pou en deryen fwa mon enplor ou pour silvouple pa les mon moral tonbe.

*En Malere dan douler*

## Panik dan kan rouz

Wikenn pase SPPF ti taye pou fer distribye 'People Plus' Glacis zis akoz SNP tya pe vizit

onnen kote dimoun ki travay plis ki 25an i ganny larzan pou fer en lakaz kan zot, loder dile i ankor dan zot labous, me zot annan lakaz, later, loto, biznes! Get enpe kote zot sorti silvouple!

### Dolor napa pider!

Vre serten dimoun dan nou sosyete napa pider. Enn se Mr. Dolor Ernesta. In esey fer en pale, in fel e in ganny pouse koman minis. I marse parey en eran pe esey vann lasirans. Napa keksoz ki i pa'n fer e plennyen an menm tan. La aprezan in rekomanmans ekri gonaz dan zournal 'People'. Stanley Beaufond i annan en sanson lo sa.

### Tonton Makout *reloaded*

Nepli annan SB. Aprezan i apel NIS e i tonm direkteman anba State House. Nouvo Makout sa?

distrikt. Douler lo zot. Dokter ti pre pou ganny latak. Atansyon, dimoun lizye pe ouver!

## Konvansyon SNP 2009

**SNP i annan gran plezir enform tou manm ki Konvansyon aniel pou fer Dimans le 8 Novanmn, 2009, apartir 3pm dan Sant Konferans Enternasyonnal. Kontakte zot reprezantan distrikt pour plis detay lo tou laranzman.**

# SNP Nou Pou Touzour La Pour Zot